

大乘阿毗達磨雜集論述記卷第二十九

唐京兆大慈恩寺沙門窺基撰

決擇分中論品第四

云何論決擇略說有七種。謂義決擇。釋決擇。分別顯

示決擇。等論決擇。攝決擇。論軌決擇。秘密決擇。

利他論品有二。初略問答。後廣別釋。

義決擇者。謂依六義而起決擇。

義決擇有二。初標。後釋。

何等六義。謂自性義。因義。果義。業義。相應義。轉義。

釋中初列。後辨。

自性義者謂徧計所執等三自性。因義者謂三因。一
生因。二轉因。三成因。生因者謂因等四緣。由此能生
諸有為故。轉因者謂由此次第彼法轉。如無明緣行
等乃至集滅。由此次第染淨轉。成因者謂現量可
得不可得等正說所攝。由此能成立先所未了所成
義故。

成因者謂現量可得不可得等正說所攝者於宗
等中不與現量相違名可得。不與比量等相違名
不可得。

果義者謂五果。何等為五。一異熟果。二等流果。三增

上果。四士用果。五離繫果。異熟果者謂阿賴耶識等
等流果者謂前生諸善法所起自相續後諸善法。增
上果者謂一切有情共業增上力所感器世閒生士
用果者謂稼穡等。離繫果者謂由聖道隨眠永滅。業
義者謂五種業。一取受業。二作用業。三加行業。四轉
變業。五證得業。此五業義如前業染中釋。

正說五種業如前第七卷說。

相應義者謂五種相應。何等為五。一聚結相應。二隨
逐相應。三連綴相應。四分位相應。五轉變相應。聚結
相應者謂於舍等有木石等。隨逐相應者謂隨眠等

因由有此故。雖煩惱等不現行而說與彼相應。連綴相應者。謂親屬等展轉相應。分位相應者。謂攝受益等相續分位。由此分位現前說名與樂相應。乃至與不苦不樂相應。故轉變相應者。謂客塵煩惱等現前。由有此故說與貪等信等相應。轉義者。謂五種轉。一相轉。二安住轉。三顛倒轉。四不顛倒轉。五差別轉。相轉者。謂生等三有為相。由彼三相差別轉故。安住轉者。謂所持法住能持中而轉故。顛倒轉者。謂雜染法不如實轉故。不顛倒轉者。謂清淨法如實轉故。差別轉者。謂一切行過去未來現在內外等差別轉故。釋

決擇者。謂能解釋諸經宗要。開發彼義故。

第二釋決擇有二。初總釋釋決擇。後別釋。

此復云何。略有六種。謂所徧知事。所徧知義。徧知因緣。徧知自性。徧知果。彼證受。由此六義。隨其所應。徧釋諸經故。名釋決擇。所徧知事。謂蘊等。所徧知義。謂無常等。徧知因緣。謂淨尸羅守根門等。徧知自性。謂菩提分法。徧知果。謂解脫。彼證受。謂解脫智見。

別釋有二。初以六義釋。後以十四門。

又十四門。辯釋決擇何等十四。謂攝釋門。攝事門。總別分門。後後開引門。遮止門。轉變字門。壞不壞門。安

立數取趣門。安立差別門。理趣門。徧知等門。力無力門。別別引門。引發門。攝釋門者。謂若於是處。宣說諸經緣起。所以句義次第。意樂釋難。

十四門中。諸經緣起所由也。所以道理也。句義所註因也。次第前後也。意趣所歸也。釋難除妨也。

攝事門者。謂若於是處。約學事聖諦事等。辯釋諸經。如說諸惡者。莫作諸善者。奉行善調伏自心。是諸佛聖教。此伽他中。依三學說如是等。總別分門者。謂若處顯示。先以一句總標。後以餘句別釋。如十二暇總集經中。先說自圓淨。後他圓淨。一句後。如其次第五

句五句別釋。如是等。

十二暇總集經者。明十二有暇。得入聖位。總集諸行。經翻以無暇入聖故。

後後開引門者。謂若處顯示。能為後後開引所依。故此諸法。如是次第說。如信等五根。先後次第。必先信受。乃發精進。發精進已。然後念住。既念住已。心得安定。心安定已。方如實知。如是等。遮止門者。謂若處顯示。依止此事。遮止此事。如斤柯喻經中。依止漏盡。遮止四種補特伽羅。一處正法外。二處正法中。但得聞思。便生喜足。三於修慧中心。生怯弱。四資糧未滿。告

諸比邱我知我見我說漏盡如是等一段經文遮止

第一。不勤精進修習觀行者遮止第二。說斤柯喻遮

止第三。說船筏喻遮止第四。

我知我見我說漏盡遮止第一者我知者得盡無

生智故我見者得無學正見故說斧柯喻遮止第

三。如人執柯漸漸自盡。執行修慧怯弱自除。說船

筏喻遮止第四。如船筏行必須資糧。資糧若闕無

所能濟。故行智舟。故須資糧。資糧若闕。不至彼岸

故。

轉變字門者。謂若處顯示轉餘顯了字義。變成餘義。

如不信不知因等。伽他後當說。壞不壞門者。謂若處

顯示失壞不失壞。彼二方便。彼二差別。如善生經說

失壞者。謂染著內外依事。內依事。五取蘊為相。外依

事。田宅妻子等為相。不失壞者。謂遠離此二種染著

失壞方便者。謂不出家。雖復出家而行放逸。不得漏

盡。與此相違。是無失壞方便。佛告善生。族姓子。有二

種事。俱為美妙。若落髮鬚。乃至趣於非家。若盡諸漏

乃至自稱不受後有者。此正顯不失壞及彼方便。兼

顯失壞及彼方便。由與此相相違。故不失壞差別者。

如伽他中顯。謂諸比邱。美妙寂靜離諸漏。此顯出家

及漏盡。為顯漏盡復說餘句。謂離欲繫縛無執受涅槃任持最後身摧伏魔所使者。此顯由世閒道離欲由出世道永斷順下分結永斷順上分結永斷內依事。此則略說因盡果盡亦兼顯失壞差別。由與此相相違故。安立數取趣門者。謂若處顯示依爾所補特伽羅說如是言。如水喻經中依二數取趣說三種四種差別言。何等為二。謂異生及見諦。異生差別有三。謂無白法少白法多白法。見諦差別有四。謂住四果三有學一無學。安立差別門者。謂若處顯示四句等所問義。

安立差別門有二。初標後釋。

如無常經說若正觀者一切觀色耶。設觀色者一切正觀耶。應作四句。初句謂於受等四蘊無有常淨樂我顛倒增益又觀彼為應知應斷。第二句謂於色蘊有常淨樂我顛倒增益又觀彼為不應知不應斷。第三句謂於色蘊無有常淨樂我顛倒增益又觀彼為應知應斷。第四句謂於受等四蘊有常淨樂我顛倒增益又觀彼為不應知不應斷。如因色作四句如是因受等一切處應廣說。乃至說言若所作已辦者一切自謂不受後有耶。設自謂不受後有者一切所作

已辨耶。此應作四句。初句謂諸異生乃至命終恆行妙行。第二句謂斷見者。第三句謂無學。第四句謂除上爾所相。

釋有二。初依五蘊。後依所作已辨。初中復有二。初色後四蘊門。

理趣門者。謂若處顯示六理趣義。

理趣門有二。初標。

何等為六。一真義理趣。二證得理趣。三教導理趣。四離一邊理趣。五不思議理趣。六意樂理趣。如是六種。前三如其次第。應隨後三決了。如愛味經中佛告諸

比丘於色有味。乃至廣說。此中顯示由遠離增益損減。二邊理趣決了真義理趣。有味有患有出離者。顯離損減邊於色。乃至於識者。顯離增益邊。由顯示染汙清淨。唯依諸蘊不依我故。乃至告諸比丘。我自證知由此故。乃至已證覺無上正等菩提者。顯由不思議理趣決了證得理趣。此顯真證內自所受。故如是一切經皆是。教導理趣應隨意樂理趣決了。謂依所徧知事。所徧知義。徧知徧知果。彼證受意樂。說此經所徧知事者。謂色等。所徧知義者。謂有味等。由此差別義。徧知色等事故。徧知者。謂於五取蘊。由如是三

轉如實徧知徧知果者謂從此諸天世間乃至并天人皆得解脫乃至極解脫彼證受者謂自證知我已證覺無上正等菩提。

後釋中初列後辨。

由如是三轉如實徧知者謂前所說愛味過患出離三也。或後門所說徧知相有三差別是一味二出離三徧知徧知卽第三轉故。

徧知等門者謂若處顯示依真實相宣說徧知相義永斷相義作證相義修習相義屬此真實相等品類差別相義能依所依相屬相義徧知等障礙法相義。

徧知等隨順法相義於不徧知等及徧知等過失功德相義此亦如愛味經廣說真實相者謂取蘊所攝苦諦相徧知相者謂卽於此有味等如實智永斷相作證相者謂從一切世閒得解脫由永斷諸障證得轉依故修習相者謂離顛倒心多修習住品類差別相者真實相有五種差別謂色乃至識徧知相有三種差別謂味由味故乃至出離由出離故如實知永斷相作證相各有二種差別謂煩惱解脫苦解脫從此諸天世閒乃至并天人皆得解脫者顯煩惱解脫爲顯此差別義故次說出離言何以故由餘經言出

離云何謂若於是處貪欲永滅貪欲永斷超過貪欲
 故。如是由能生未來苦煩惱得離繫故苦亦解脫為
 顯此差別義故次說離繫縛極解脫修習相有二種
 差別謂見道修道離顛倒心者顯示見道多修習住
 者顯示修道能依所依相屬相者謂顯示真實相等
 為後後所依性。徧知等障礙法相者謂如是三轉不
 如實知。徧知等隨順法相者謂觀察如所安立色等
 法中味等相。於不徧知等過失相者謂不解脫乃至
 不證覺無上正等菩提與此相違名於徧知等功德
 相。

能依所依相屬相者謂顯示真實相等為後後所
 依性。即前真實相為徧知依徧知立即永斷依。永
 斷為作證依作證為修習依即苦集滅道次第為
 依。

力無力門者謂若處顯示諸一一句皆有功能若不
 說一句義即不了。如緣起經說此有故彼有此生故
 彼生所謂無明緣行等如是諸句。一一皆有功能如
 前緣起相中說別別引門者謂若處顯示先標經一
 句後以無量義門廣釋。如經言若比丘成就六法尚
 能口風吹碎高廣大雪山王況無明死屍何等為六

若諸比丘心生善巧乃至方便善巧云何比丘心生善巧所謂比丘離欲惡不善法乃至第四靜慮具足住如是比丘心生善巧云何比丘心住善巧所謂比丘善修習故所有順退分靜慮轉為順住分如是比丘心住善巧云何比丘心起善巧所謂比丘善修習故所有順住分靜慮轉為順勝進分如是比丘心起善巧云何比丘生長善巧所謂比丘未生善法方便令生乃至廣說二正斷如是比丘生長善巧云何比丘損滅善巧所謂比丘已生惡法方便令斷乃至廣說二正斷如是比丘損滅善巧云何比丘方便善巧

所謂比丘欲三摩地斷行成就修如意足乃至廣說四如意足如是比丘方便善巧。

力無力有功能名力無功能名無力。

引發門者謂若處顯示一一句中宣說是句是一一
句復分四句如是展轉無邊引發。

引發門有三初標次顯後結。

如引佛經言諸菩薩有四種淨修菩提法一者善修空性二者於諸眾生心無罣礙三者常攝利益諸菩薩眾四者以無染心廣開法施。

顯中有二初引經四句後各出引四句初中有三

初總標次顯四句後釋四所以。

如是四法於自利利他門淨修菩提爲欲對治四種所治障故。何等爲四。一貪著定味。二瞋恚。三慢。四愛著利養。又有差別。初顯煩惱斷對治。餘顯遠離下劣乘。由諸菩薩三種因緣。遠下劣乘。一攝受一切有情。二已入法者令成熟。三未入法者令入正法。

釋四所以中有三復次。初除四障。次顯斷治及離下劣等。後明福智資糧。

又有差別。初顯智資糧。餘顯福資糧。此二差別者。攝受成熟。令人三門各能生長勝品福故。又由二緣差

別。一由意樂謂慈心俱。二由正行謂說證教二行。

資糧中釋後三有二復次。初令人三乘門。後二緣差別。謂慈心俱於生心無礙。說證正行。攝益菩薩眾說教正行。

又諸菩薩成就四法能修空性。一者於內心無動搖。二者信解擇力所持。三者於一切法如實通達。四者解脫一切障。如是四法顯修所依及修差別。以何爲依。謂靜慮波羅蜜多。云何修差別。一由異生道。謂聞思力所持。二由學道。謂達諸法實性。三由無學道。謂脫一切障。又諸菩薩成就四法於諸有情心無罣礙。

一者修慈。二者不毀正行。三者不分別相。四者堪忍
劬勞。如是四法顯所依及無罣礙心差別。誰為所依。
謂過去生所修慈云何無罣礙心差別。謂於住邪行
所心無違毀於怨家所不分別怨想為利益他精勤
無懈。又諸菩薩成就四法常能攝益諸菩薩眾。一者
不自稱量。二者正教誨轉。三者柔和易可共住。四者
精勤承事供養。如是四法顯示所依及攝益差別。何
等為依。謂摧伏憍慢云何攝益差別。謂後所說三句。
於劣等勝。三種菩薩所知。如其次第。又諸菩薩成就
四法能無染心廣開法施。一者善達障難。二者善能

除遣愚癡沉沒。三者歡喜攝受。四者愛樂為依怙法。
如是四法顯示所依及廣開法施差別。何等為依。謂
善通達利養恭敬是障難法云何廣開法施差別。謂
示現教導讚勵慶喜示現者於愚癡沉沒。教導讚勵
者於著放逸自輕下劣。慶喜者於正行圓滿由性愛
樂法故。如是前四句中。一一句復引發四句差別。如
是等名引發門。

廣開法施別別生四中皆初標後釋。釋中初總後
別。別中所依皆是初。差別皆後三。次第配之。
分別顯示決擇者。謂於如所說蘊等法中隨其所應

作一行順前句順後句。二句。三句。四句。述可句遮止句等。一行者。即問論法。謂以一法與餘法。一一互相問。已除此法。更以第二法與餘法互相問。如是一一問一切法。如有問言。若成就眼處亦色處耶。設成就色處亦眼處耶。此應作順前句答。若成就眼處亦耳處耶。此應作四句答。如是乃至對意處。如理應說。

一行中若就眼亦耳處耶。四句乃至意處亦爾。不然。身與眼何得有四。何有識眼非身處。此中大判非有是理。云如理應說。

若成就眼處亦法處耶。此亦應作順前句答。若成就

色處亦眼處耶。設成就眼處亦色處耶。此應作順後句答。若成就色處亦耳處耶。此亦應作順後句答。如是乃至對法處。如理應說。若成就耳處亦眼處耶。此應作四句答。如是乃至對法處。如理應說。如是一一次第漸減。諸處更互。如理應說。順前句者。謂於諸法中。隨取二法。更互相問。依止前法以答所問。如有問言。若智亦所知耶。設所知亦智耶。此應作順前句答。諸智亦所知。有所知非智。謂餘法。順後句者。謂即二法展轉相問。依止後法以答所問。如有問言。若所取亦能取耶。設能取亦所取耶。此應作順後句答。諸能

取亦所取有所取非能取謂色等五境及法處除相
 應二句者謂於所問應二句答不得有餘如有依蘊
 建立依界建立而發問言若蘊數亦界數耶設界數
 亦蘊數耶此應作二句答或蘊數非界數謂色蘊識
 蘊何以故無有一界全攝色蘊相或全攝識蘊相故
 或界數非蘊數謂法界三句者謂於所問唯三句答
 如有問言若蘊數亦處數耶設處數亦蘊數耶此應
 三句答或蘊數非處數謂色蘊或處數非蘊數謂法
 處或蘊數亦處數謂識蘊意處俱非數者於蘊處中
 決定不有四句者謂於所問作四句答如有問言若

成就眼根亦耳根耶設成就耳根亦眼根耶應四句
 答初句謂聾者眼根已生不捨第二句謂盲者耳根
 已生不捨第三句謂眼耳根已生不捨第四句除上
 爾所相述可句者謂於所問順爾而答以如是言述
 可所問如有問言諸無常者皆是行耶設當是行皆
 無常耶應述可答所問如是遮止句者謂於所問不
 爾而答以不爾言遮止所問如有問言蘊外諸行幾
 諦攝耶應遮止答蘊外無行等論決擇者謂依八何
 八若之詞問答決擇一切真偽八何詞者且如問言
 何誰無所得謂已得般若波羅蜜多菩薩摩訶薩何

所無所得謂所取相能取相。用何無所得謂用般若
 波羅蜜多。爲何無所得謂爲救脫一切有情令住無
 上正等菩提。由何無所得謂由遇佛出世聽聞正法
 如理作意法隨法行。何之無所得謂一切法之無所
 得。於何無所得謂於勝解行地乃至第十菩薩地。幾
 何無所得謂十一種。一已生已滅。二未生。三現前。四
 因力所生。五善友力所生。六一切法無所得。七空性
 無所得。八有我慢。九無我慢。十未具資糧。十一已具
 資糧。如是十一無所得。隨所有過去未來現在若內
 若外若麤若細若劣若勝若遠若近次第應知如何

詞若詞亦爾。謂若能無所得若所無所得若用無所
 得若爲無所得若由無所得若彼無所得若於無所
 得若爾所無所得如是。一切處盡當知。復有四種等
 論決擇道理。謂能破能立能斷能覺能破者謂遮破
 他宗言彼惡說非爲善事。能立者謂建立自宗言此
 善說眞爲善事。能斷者謂能決種種他所生疑。能覺
 者謂開曉愚情令解妙義。

大乘阿毗達磨雜集論述記卷第二十九

Date	Page